

COLUMNA

Rap, rock, pop e hip-hop

RITA CATHOMAS-BEARTH

Quests dis hai jau legì ina intervista cun *Gino Clavuot* alias *Snook*, il rapper rumantsch cun ragischs brasilianas. Per mai totalmain nunenconuschent, malgrà ch'el fa gia dapi onns musica. Rap, rock, pop e hip-hop na taidlel jau mai, n'er betg il rumantsch. Ma las respostas da Snook, l'ambassador da la segunda Emna Rumantscha, èn stadas per mai sorprendentas. In giuven ch'associescha lingua cun patria ed exprima ses sentiments en plects che van a cor. In imni er a la valita da l'identitad per il bainstar uman.

En l'internet hai jau tschertgà dapli da quest Snook e sun arrivada tar ina chanzun ch'el ha registrà il 2013 cun il titel «Lingua Materna». Qua dechantan giuvens cun ragischs da diversas naziuns lur linguatg mamma en tun frestg e colurà. Quai m'ha tutgà. Gea, il linguatg nun è betg mo lingua, mabain er cultura, istorgia, tradiziun, emozion, ragisch. Quai vala per tut las naziuns ed er per las diversas regiuns linguistics rumantschas. Noss cor è là, nua che nus avain vivì e vivain ed ans sentin da chasa e da quai essan nus loschs.

En connex cun quella tschertga da chanzuns sun jau fruntada sin ulteriur-



ras chantaduras e chantadurs rumantschs. Cler, *Corin Curschellas*, *Mario Pachioli*, *Astrid Alexandre*, *Ursina*, *Marcus* ed *Alexi* etc. enconuscheva jau gia. Ma da *Giganto*, *Pascal Gamboni*, *Liricas Annalas*, *Tartaruga* e pli baud *Hades* aveva jau udi pauc dapli ch'il num. Rap, rock, pop e hip-hop n'è betg mes emprim mund. In entir avantmezdi sun jau navigada tras youtube ed hai tadlà chant rumantsch per ureglias giuvnas. Scuvert hai jau vairas animaturas ed animaturs da linguatg e cultura rumantscha, poetes e poets cun texts provocants, melancolics, filosofics, pensivs. Chant e musica che rinforza la schientscha, er senza menziunar u ludar quella, en ed er sur noss stretgs cunfins or.

«Lingua Materna» pitga en cun mintga tun e pled che nus n'essan betg in pievel monoling sco blers au-

ters, nus essan bi-, tri- e plurilings. Nus tuts discurren almain rumantsch, tudestg e schwizertütsch e nossas biadias e biadis savens er anc englais, talian, portugais u spagnol. Lavurers e lavurers esters han enritgì betg mo noss bainstar material, er nosa cultura, noss pensar, han schlargià noss orizont. La Svizra rumantscha è in model da multiculturala e plurilinguitad ed in exempel da convivenza. Sco en mintga famiglia datti er svaris tar nus, ma differenzas enritgeschan, e sch'i fa basegn ans tegnain nus ensemen.

Sco Sursilvana da la generaziun veglia smirvegl jau, quantas giuvnas e giuvens cun schlattainas tudestgas, talianas, portugaisas, greccas, spagnolas discurren rumantsch uschè perfetg sco mintga indigen che sa numna Cathomas, Nuotclà u Spinatsch. Franc han bleras e blers da nus ragischs d'autras etnias, ma en questa cumulaziun sco ils davos decennis n'è nosa cuminanza mai sa maschadada. Ed ella sa cumprova ed integrescha ils immigrads. Rap, rock pop e hip-hop rumantsch contribueschan a moda frestga, frecha ed emozionala ad identitad e patria.

Rita Cathomas-Bearth è oriunda da Rabius, viva a Cuira, ama musica e literatura, ma scuverta pir suenter 70 onns il rap, rock, pop e hip-hop.